



# Víðtæk flutningstrygging

Skilmáli nr. MC10

Tryggjandi er VÍS tryggingar hf., kt. 670112-0470, hér eftir nefnt „VÍS“.

## Um trygginguna gildir:

- Skírteinið ásamt áritunum og sérskilmálum.
- Skilmáli þessi nr. MC10.
- Almennur skilmáli VÍS nr. YY10.
- Lög um vátryggingarsamninga nr. 30/2004.

Skírteini og endurnýjunarkvittun ganga framar skilmálum. Skírteini, endurnýjunarkvittun og skilmálar ganga framar frávikjanlegum lagaákvæðum.

**Víðtæk flutningstrygging** bætir allt tjón á farmi nema það sem er sérstaklega undanskilið. **Takmörkuð flutningstrygging** tekur eingöngu á þeim bótaþáttum sem taldir eru upp í tryggingunni.

**Skilmáli** segir til um hvaða réttindi og skyldur þú og VÍS hafið. **Skírteini** staðfestir að þú hafir keypt tryggingu hjá VÍS. Skírteinið er aðgengilegt með því að skrá sig inn á vis.is.

**Farmur** er samheiti yfir þær vörur sem tryggðar eru í þessum skilmála.

## 1. Hvað er tryggt?

- 1.1 Farmur sem tilgreindur er í skírteini og/eða farmtryggingarsamningi.
- 1.2 Hægt er að tryggja aukið verðmæti farms.

## 2. Hver er tryggður?

- 2.1 Eigandi farms.
- 2.2 Tryggingin er ekki til hagsbóta fyrir þá sem eiga fjárhagslega hagsmuni í farminum, t.d lánastofnanir eða aðra veðhafa, nema þeir hafi fengið staðfestingu þess efnis frá VÍS, en þá öðlast þeir aldrei meiri rétt gagnvart VÍS en tryggður.<sup>1</sup>

## 3. Hvar gildir tryggingin?

- 3.1 Í flutningi til og frá þeim stöðum sem koma fram í skírteini og/eða farmtryggingarsamningi.

## 4. Flutningsaðili

- 4.1 Tryggingin gildir eingöngu þegar farmur er fluttur með viðurkenndum flutningsaðila.

## 5. Hvað bætir tryggingin?

- 5.1 Tjón á farmi af völdum skyndilegra og óvæntra atvika í flutningi.
- 5.2 Samtjónsframlög og björgunarkostnað sem jafnað er niður eða ákveðinn er samkvæmt flutningssamningnum og/eða gildandi lögum og venjum og stofnað er til í þeim tilgangi að forðast hvers konar tjón.
- 5.3 Eðlilegan kostnað við að losa farminn, geyma hann og senda áfram til ákvörðunarstaðar samkvæmt skírteini og/eða farmsamningi ef umsaminni ferð verður slitið áður en henni lýkur vegna bótaskylds tjóns. Ákvæði þetta gildir ekki um samtjónsframlög og björgun.
- 5.4 Sjórán.
- 5.5 Tjón tryggðs vegna endurkröfu sem kann að falla á hann sem eiganda farms vegna sérreglu um ábyrgð, í beggja sök í árekstri (Both to Blame Collision Clauses) í flutningssamningi.

## 6. Hvað bætir tryggingin ekki?

- 6.1 Tryggingin bætir ekki skemmdir, kostnað eða það að farmur glatast ef það stafar af:
  - a) Venjulegum leka, venjulegri rýrnun í þunga eða rúmmáli, eðlilegu sliti eða tæringu á hinu tryggða.
  - b) Innri skemmd eða eðli hins tryggða.
  - c) Töf, jafnvel þótt hún hafi orðið vegna bótaskylds tjóns. Þetta gildir þó ekki um kostnað sem fellur undir gr. 5.2 hér að framan.
  - d) Gjaldþroti eða fjárhagslegum vanefndum eiganda skips, leigutaka eða rekstraraðila þess.
  - e) Farbanni, fartöf eða kyrrsetningu eða tilrauna til slíks og afleiðingum sem af því stafa.

<sup>1</sup> Sbr. ákvæði um meðvátryggða í 39. og 41.-43. gr. laga um vátryggingarsamninga nr. 30/2004.



- f) Tundurdufli, tundurskeyti, sprengju eða öðrum yfirgefnum stríðsvopnum.
- g) Hryðjuverkum eða pólitískum aðgerðum.

## 7. Varúðarreglur

- 7.1 Tryggður skal sjá til þess sjálfur eða í samráði við seljanda vöru og/eða flutningsaðila að umbúðir og frágangur vöru til flutnings sé fullnægjandi með hliðsjón af því sem verið er að flytja.
- 7.2 Ef tryggður eða aðilar í hans þjónustu vita að senda á farm með skipi sem er óhaffært eða flutningsfari, flutningstæki, gámi eða flutningsvagni sem óhæfur er til öruggs flutnings skulu þeir sjá um að farmurinn sé ekki sendur af stað.

## 8. Upphaf og lok ábyrgðar

- 8.1 Tryggingin hefst um leið og sjálfur flutningurinn, þ.e. þegar farmur er tekinn úr húsi eða annarri geymslu á sendingarstaðnum sem nefndur er í skírteini og heldur gildi á venjulegri flutningsleið til ákvörðunarstaðar.
  - 8.1.1 Upphaf ábyrgðar samkvæmt tryggingunni hefst þó ekki fyrir en áhætta af farmi hefur flust yfir á tryggðan samkvæmt þeim afhendingarskilmála sem fram kemur í kaupsamningi. Tryggður getur því aðeins krafist VÍS um bætur ef hann hefur átt tryggingarhæfa hagsmuni í farmi á þeim tíma þegar tjónið varð.
- 8.2 Tryggingunni lýkur við það sem fyrst gerist af þessu þrennu:
  - 8.2.1 Við komu farms í hús móttakanda eða í aðra endanlega geymslu á ákvörðunarstaðnum, sem nefndur er í skírteini.
  - 8.2.2 Við komu í annað hús eða geymslu á ákvörðunarstaðnum og á leið þangað, þótt ekki sé um venjulega flutningsleið að ræða, enda hafi tryggður valið þann stað til geymslu, sölu eða dreifingar.
  - 8.2.3 Sextíu dögum eftir að farmur var losaður úr skipinu í endanlegri uppskipunarhöfn.
- 8.3 Ef farmur er losaður í endanlegri uppskipunarhöfn og ákveðið verður, áður en tryggingunni lýkur, að senda hann annað en til ákvörðunarstaðarins, lýkur tryggingunni eins og kveðið er á um í 8.2 hér að framan, en þó aldrei síðar en þegar flutningurinn til nýja ákvörðunarstaðarins hefst.
- 8.4 Tryggingin heldur gildi sínu (með sömu ákvæðum um slit hennar eins og að ofan greinir og ákvæðum í gr. 8.5 hér á eftir) ef töf verður á ferð sem tryggður fær ekki um ráðið, svo og þegar vikið er af leið, losað er í neyð, endurlestað eða umskipað eða meðan á sérhverri breytingu á ferð stendur, ef þetta á sér stað samkvæmt heimild í flutningssamningi við eiganda skips eða leigutaka þess.
- 8.5 Ef flutningnum verður slitið áður en honum átti að ljúka eða flutningnum lýkur á annan hátt áður en farmur kemst til skila á ákvörðunarstaðnum, sbr. gr. 8.2 hér að framan, og tryggður fær engu um þetta ráðið, þá lýkur tryggingunni um leið. Nema tryggður tilkynni VÍS þegar í stað um hvernig komið er og óski eftir framlengingu á tryggingarsamningnum. Heldur þá tryggingin gildi sínu annað hvort:
  - 8.5.1 Þar til farmur er seldur í slíkri höfn eða í 60 daga eftir komu farms til slíkrar hafnar eða staðar, hvort heldur fyrir verður.
  - 8.5.2 Þar til tryggingunni lýkur í samræmi við ákvæði gr. 8.5 hér að framan ef farmur er sendur áfram innan nefndra 60 daga til ákvörðunarstaðar sem tilgreindur er í skírteini eða annars ákvörðunarstaðar.
- 8.6 Ef tryggður breytir um ákvörðunarstað eftir að tryggingin hófst skal hann tilkynna það til VÍS tafarlaust. VÍS mun þá halda tryggingunni í gildi með þeim breytingum á skilmálum og verði sem um semst.

## 9. Háttsemi annarra

- 9.1 Við ákvörðun bótaábyrgðar áskilur VÍS sér rétt til að bera fyrir sig háttsemi maka tryggðs og einstaklings sem hann býr með í föstu varanlegu sambandi.<sup>2</sup>
- 9.2 Í atvinnurekstri getur VÍS borið fyrir sig háttsemi stjórnenda tryggðs og umsjónaraðila farmsins.

## 10. Áhættubreyting

- 10.1 Ef breyting verður á flutningsleið eða flutningsfari og það getur haft í för með sér aukna áhættu á tjóni skal tilkynna það VÍS tafarlaust. Um réttaráhrif áhættuaukningar fer eftir ákvæðum laga um váttryggingarsamninga nr. 30/2004.

## 11. Tryggingarfjárhæð

- 11.1 Tryggingarfjárhæð kemur fram í skírteini.

## 12. Bætur fyrir algert tjón

Með afhendingarskilmálum er átt við staðlaða skilmála (t.d. FOB, FCA og CIF) gefna út af International Chamber of Commerce (ICC).

<sup>2</sup> Sbr. 29. gr. laga um váttryggingarsamninga nr. 30/2004.



12.1 VÍS greiðir bætur fyrir algert tjón ef farmur hefur verið yfirgefinn, annaðhvort vegna þess að algert tjón á honum virtist óumflýjanlegt eða kostnaður við að bjarga honum, gera við hann og senda hann áfram til ákvörðunarstaðar samkvæmt skírteini og/eða farmsamningi fer fram úr verði hans þar.

### 13. Ákvörðun bóta

- 13.1 Bætur skulu miðaðar við verðmæti á tjónsdegi.
- 13.2 Sé aukið verðmæti farms tryggt bætist það í sama hlutfalli og hinn tryggði farmur.
- 13.3 Ef unnt er að gera við það sem skemmdist þá getur VÍS annað hvort greitt áætlaðan viðgerðarkostnað eða látið gera við það sem skemmdist þannig að það sé í sama eða svipuðu ástandi og fyrir tjón. Það telst fullnaðarviðgerð þó að sjá megi að gert hafi verið við hlutinn.
- 13.4 Ef ekki er unnt að gera við það sem skemmdist eða það borgar sig ekki að mati VÍS þá getur VÍS greitt bætur í peningum eða útvegað sambærilegan hlut og varð fyrir tjóninu. Hafi VÍS greitt bætur samkvæmt þessari grein áskilur það sér rétt til að gera tilkall til þess sem skemmdist.
- 13.5 VÍS hefur rétt til að greiða mismun á verðmæti þess sem skemmdist eins og það var fyrir tryggingaratburð og verðmæti eftir tryggingaratburð.
- 13.6 Tryggður skal ekki hagnast á tryggingaratburði. Tryggingin skal einungis bæta raunverulegt tjón tryggðs.

### 14. Framsal

- 14.1 Tryggður má ekki án samþykkis VÍS framselja réttindi sín samkvæmt tryggingarsamningnum.

**Það sem fram kemur á hægrí spássíu er eingöngu til leiðbeiningar fyrir viðskiptavini en er ekki hluti af texta skilmálans og ekki ætlað til túlkunar einstakra greina hans.**